

# BULETIN Maklumat Pertanian Malaysia

Jun 1984 \* Jil. 4 Bil. 2

ISSN: 0127-0575 KDN 0350/84

---

## KANDUNGAN

---

### Fokus:

Lembaga Pendaftaran dan Pelesenan Minyak  
Kelapa Sawit (PORLA)  
Janet Chan  
..... 1

Senarai Ulasan Makalah (Review Articles)  
Pilihan ..... 5

Bibliografi Pertanian Malaysia ..... 8

Istilah Pertanian Pilihan .....27

Kalendar Kongres Pertanian..... 37

---

## LEMBAGA PENDAFTARAN DAN PELESENAN MINYAK KELAPA SAWIT (PORLA)

---

Janet Chan  
Lembaga Pendaftaran dan Pelesenan Minyak  
Kelapa Sawit (PORLA)

---

### Latar belakang

Lembaga Pendaftaran dan Pelesenan Minyak Kelapa Sawit (PORLA) adalah sebuah agensi kerajaan yang ditubuhkan untuk mengawasi perusahaan kelapa sawit bagi memastikan perkembangannya yang teratur. Ditubuhkan di bawah Akta 179 Lembaga Pendaftaran dan Pelesenan Minyak Kelapa Sawit (perbadanan) 1976 pada 15 Mei 1977, PORLA telah dilancarkan dengan resminya pada 31 Oktober 1977.

### Motivasi

PORLA ditubuhkan dengan tujuan mengawasi serta memajukan pengeluaran dan eksport minyak sawit, menggalakkan sistem pemasaran dan pengendalian yang cekap bagi faedah kedua-dua pihak pengeluar dan pengguna.

Ia juga bertujuan untuk membaami sebarang penyelewengan di dalam urusiaga yang boleh mencemarkan imej perusahaan kelapa sawit secara

keseluruhannya.

### Fungsi

Bagi menjalankan tugas-tugas dan peranan yang telah dipertanggungjawabkan kepada Lembaga ini, PORLA bergerak selaras dengan fungsi-fungsi utamanya seperti berikut:-

1. untuk mengawal, menyelaraskan dan memajukan semua aktiviti berhubung dengan pembekalan, penjualan, pembelian, pengedaran dan pengimportan buah kelapa sawit, minyak kelapa sawit dan isirong kelapa sawit serta pengilangan buah kelapa sawit;
2. untuk menggalakkan pemasaran dan pengendalian yang cekap tentang buah kelapa sawit, minyak kelapa sawit dan isirong kelapa sawit;
3. untuk mengawal dan memperbaiki cara menyimpan dan mengangkut minyak kelapa sawit dengan kapal;
4. untuk memajukan langkah-langkah ke arah mencapai kualiti yang tinggi bagi minyak kelapa sawit termasuk menetapkan standard-standard (piawai) dan mengadakan suatu sistem penggredan yang cekap;
5. untuk bekerjasama dengan badan-badan lain dalam menyelaraskan dan menggalakkan penubuhan perusahaan-perusahaan yang mengeluarkan atau menggunakan minyak kelapa sawit;
6. untuk mengumpul maklumat-maklumat dan menyelenggara rekod-rekod tentang semua perkara yang berkaitan dengan perusahaan minyak kelapa sawit; dan
7. amnya melakukan apa jua perkara untuk memajukan lagi dan menjalankan dengan sempurna perusahaan minyak kelapa sawit.

### Kuasa-kuasa

Bagi menjalankan fungsi-fungsi di atas, PORLA telah diberikan kuasa-kuasa seperti berikut:

---

MPM ialah sebuah buletin suku tahunan yang diterbitkan oleh Perpustakaan Universiti Pertanian Malaysia. Pandangan dan pendapat penyumbang tidak semestinya mencerminkan pandangan atau pendapat jemaah perkarang. Buletin ini diberi secara percuma atas permintaan. Sila alamatkan semua surat menyurat/pertanyaan kepada: Ketua Pengarang, Buletin Maklumat Pertanian Malaysia, Perpustakaan, Universiti Pertanian Malaysia, Serdang, Selangor.

Penaikhat: Syed Salim Agha; Ketua Pengarang: Ibrahim Kassim.  
Pengarang-pengarang: Badilah Saad; Jamaliah Ahmad; Kurnariah Abdul Hamid; Nor Hajar Abu Bakar.  
Penyunting: Jama'yah Zakaria


1. menghendaki supaya didaftar dan dilesen orang-orang yang berkenaan dengan mana-mana atau semua aktiviti yang termasuk di dalam bidang tugas-tugas Lembaga;
2. mengadakan peruntukan mengenai perkara-perkara berhubung dengan pendaftaran dan pelesenan, termasuklah cara memohon pendaftaran dan lesen, bayaran yang kena dipertimbangkan dalam memberi atau menolak sesuatu permohonan lesen, dan mengenakan dan mengubah syarat-syarat dan sekatan-sekatan;
3. mengadakan peraturan mengenai sesuatu atau semua aktiviti yang termasuk di dalam bidang tugas-tugas Lembaga dengan apa-apa cara selain daripada atau sebagai tambahan kepada pendaftaran dan pelesenan;
4. mengadakan peruntukan mengenai amalan-amalan yang hendak diikuti atau dielakkan dalam perusahaan minyak kelapa sawit;
5. mengadakan peruntukan mengenai pendaftaran kontrak-kontrak berhubung dengan penjualan minyak kelapa sawit dan butir-butir mengenai kontrak-kontrak itu;
6. menentukan dan mentakrifkan standard-standard atau gred-gred minyak kelapa sawit dan membuat peruntukan-peruntukan bagi menguatkuasakan standard-standard dan gred-gred itu, termasuk peruntukan-peruntukan mengenai atau berhubung dengan pelabelan;
7. menetapkan rekod-rekod yang hendak disimpan dan penyata-penyata yang hendak dikemukakan oleh pemegang-pemegang lesen;
8. menetapkan bayaran yang kena dibayar bagi apa-apa perbuatan atau perkhidmatan yang dilakukan atau diberi oleh Lembaga;
9. menetapkan penalti-penalti penjara bagi pelanggaran terhadap peruntukan-peruntukan peraturan-peraturan itu selama tidak lebih daripada dua tahun atau denda tidak lebih daripada sepuluh ribu ringgit atau penjara dan denda itu kedua-dua;
10. mengadakan apa-apa rundingan dengan perkiraan yang difikirkan perlu oleh Lembaga bagi memajukan kepentingan am

perusahaan minyak kelapa sawit; dan

11. menubuhkan jawatankuasa-jawatankuasa untuk mengkaji dan membuat laporan mengenai perkara yang ditentukan oleh Lembaga dan menetapkan tugas-tugas dan elaun-elaun bagi ahli-ahlinya.

### Organisasi PORLA

#### CARTA ORGANISASI



## Aktiviti-Aktiviti PORLA

### 1. Pelesenan/Penguatkuasaan

Pada awal tahun penubuhannya, PORLA menumpukan perhatiannya terhadap kerja-kerja asas bagi melaksanakan fungsi-fungsi yang telah dinyatakan dalam Akta PORLA. Di dalam tempoh masa ini, rangka peraturan yang dinamakan sebagai Peraturan-peraturan Perusahaan Minyak Kelapa Sawit (Pelesenan) 1979 telah dapat dikuatkuasakan pada 1 Mac 1979. Ini merupakan julung-julung kali suatu peraturan telah dikenakan kepada perusahaan minyak sawit. Peraturan ini meliputi semua peringkat perusahaan bermula daripada penjualan buah kelapa sawit hinggalah ke peringkat pengeksportan bahan-bahan daripada minyak sawit yang telah diproses. Tujuan utama mengadakan Peraturan Pelesenan ini adalah untuk mewujudkan peraturan dan garis panduan kepada mereka yang terlibat di dalam perniagaan minyak sawit serta mencegah daripada berlakunya amalan-amalan yang tidak sihat.

Setiap orang atau syarikat yang terlibat dalam mana-mana kegiatan dalam perusahaan minyak sawit dikehendaki mendapatkan lesen yang harus diperbaharui pada tiap-tiap tahun. Yuran lesen adalah \$100/- bagi setiap aktiviti. Walau bagaimanapun, pekebun kecil kelapa sawit - yang didefinisikan sebagai seseorang yang mempunyai kebun kelapa sawit kurang daripada 100 ekar - dikecualikan daripada sebarang pembayaran lesen berhubung dengan kegiatan menjual buah kelapa sawit.

Untuk memudahkan lagi kerja-kerja penguatkuasaan dijalankan, PORLA telah menubuhkan pejabat-pejabat wilayahnya di Johor Baru, Shah Alam, Kuantan, Butterworth dan Kota Kinabalu.

### 2. Galakan Pasaran

PORLA tidaklah terlibat dalam urusan dagangan sebenarnya, akan tetapi ia lebih menumpukan kepada aspek galakan pasaran minyak kelapa sawit. Kebanyakan keluaran minyak sawit mentah adalah diproses di-

dalam negeri dan sebahagian besar minyak sawit yang diproses adalah dieksport ke luar negeri. Minyak sawit Malaysia menghadapi saingan yang hebat bukan sahaja dari lain-lain negara pengeluar bahan yang sama seperti negara-negara Afrika dan Indonesia, bahkan ianya juga bersaing dengan negara-negara pengeluar 15 jenis minyak dan lemak yang lain. Maka, adalah penting bagi minyak sawit Malaysia mengadakan saluran pasaran yang berterusan di seberang laut.

Walaupun urusan jual beli langsung tidak melibatkan kerajaan, tetapi kerajaan atau PORLA memainkan peranan penting, umpamanya dalam urusan memudahkan kemasukan ke dalam pasaran tertentu ataupun membuat perhubungan dengan perbadanan milik kerajaan atau jabatan-jabatan kerajaan berkaitan di negara-negara tertentu.

Kegiatan penggalakan pasaran yang paling berkesan dianjurkan oleh PORLA ialah mengelolakan rombongan-rombongan penggalakan ke negara-negara terpilih. Usaha ini telah mendapat kerjasama yang sangat memuaskan daripada pihak industri dan dianggap sebagai satu sikap yang positif daripada kerajaan di dalam memperkukuh usaha-usaha yang dibuat sendiri oleh pihak industri. Selain daripada bertujuan membuat jualan, rombongan-rombongan ini juga meninjau potensi pasaran di negara-negara tersebut di samping memberi penerangan lanjut tentang penggunaan dan kelebihanannya dan seterusnya mengumpul dan menyelesaikan masalah-masalah yang dialami oleh pengguna di dalam penggunaan, penerimaan dan pengangkutan.

### 3. Pengumpulan dan Analisis Statistik

Pengumpulan dan pemrosesan data perusahaan minyak kelapa sawit adalah salah satu kegiatan yang sangat penting bagi PORLA. Dengan maklumat-maklumat ini, PORLA telah dapat mengesan dan mengawasi perkembangan perusahaan di dalam aspek keluasan ditanam, pengeluaran, harga, jualan dan stok simpanan. Ia juga telah membolehkan PORLA untuk membuat telahan berhubung dengan pengeluaran, pasaran serta analisis dasar yang

berkaitan dan maklumat-maklumat ini telah disebarkan bukan sahaja untuk kegunaan jabatan-jabatan kerajaan, bahkan juga bagi pihak perusahaan. Sumber utama bagi maklumat-maklumat yang diperolehi oleh PORLA ialah melalui penyata-penyata bulanan yang dikemukakan oleh pelesen-pelesen PORLA, iaitu terdiri daripada kilang-kilang buah, kilang penapis, kilang isirong, estet, peniaga dan pusat-pusat simpanan.

#### 4. Pendaftaran Kontrak

Melalui Pendaftaran Kontrak, pemegang-pemegang lesen PORLA adalah dikehendaki mendaftarkan perdagangan minyak sawit mentah, minyak sawit diproses serta minyak isirong sawit mereka dengan PORLA dalam masa 24 jam selepas kontrak-kontrak diselesaikan.

Pendaftaran Kontrak membolehkan PORLA mengawasi aliran pemasaran minyak kelapa sawit dan minyak isirong sawit serta mengesan pengagihannya ke kilang-kilang penapis tempatan dan juga pasaran eksport. Di samping itu, ia juga dapat mengesan dengan segera sebarang amalan pemasaran yang tidak sihat. Jangkaan boleh juga dibuat terhadap arah perkembangan harga serta keseimbangan pembelian dan pembekalan minyak sawit dan minyak isirong sawit.

#### 5. Pengawasan dan Penyebaran Harga

Daripada aktiviti pendaftaran kontrak, PORLA telah dapat mengeluarkan dan menyebarkan maklumat tentang harga-harga purata harian minyak sawit mentah dan minyak sawit diproses yang diperniagakan di dalam negeri melalui media massa. Harga-harga ini merupakan purata wajaran yang diniagakan sebelumnya. Harga-harga

ini telah juga diedarkan dengan percuma kepada pihak-pihak yang memohon terutama pengilang, organisasi kerajaan yang terlibat di dalam perniagaan ini, peniaga dan badan-badan sebaran am dalam atau luar negeri. Harga PORLA ini telah diterima sebagai harga berkecuali (neutral) dan lazimnya digunakan sebagai panduan penting untuk menentukan harga buah sawit oleh pihak-pihak pengilang, peniaga dan penjual buah, di dalam perniagaan harian dan kontrak pembekalan jangka panjang mereka.

#### 6. Penerbitan

Kepesatan perkembangan perusahaan, khususnya penubuhan Busar Dagangan Kuala Lumpur (KLCE) memerlukan penyebaran maklumat yang kemaskini dan tepat untuk kegunaan umum. Bagi memenuhi kehendak ini, PORLA telah mengeluarkan beberapa penerbitan iaitu:

- a) **Palmoil Update** -majalah bulanan yang mengandungi maklumat mengenai pengeluaran, eksport dan harga minyak sawit serta lain-lain maklumat berhubung dengan minyak sayur dan lemak dunia
- b) **Palmoil Statistical Handbook** - penerbitan tahunan yang mengandungi maklumat statistik mengenai perusahaan minyak sawit Malaysia dan perusahaan minyak sayur dan lemak dunia
- c) **Directory of Oil Palm Industry** - penerbitan tahunan dengan senarai orang-orang yang terlibat dalam perusahaan minyak sawit Malaysia
- d) **Risalah Sawit** - majalah suku tahunan, khas untuk pekebun-pekebun kecil kelapa sawit.